

四庫全書

集部

欽定四庫全書

集部
湛園集卷五

詳校官侍讀學士臣法式善

助教臣常循覆勘

總校官進士臣朱 鈐

校對官主事臣陳 墉

謄錄監生臣白玉莘

欽定四庫全書

湛園集卷五

翰林院編修姜宸英撰

傳

新城王方伯傳

公諱象晉字子進山東新城人祖重先布政使司左叅
議父之垣戶部侍郎贈尚書公季子也中萬曆甲辰科
進士授中書科舍人癸丑考選同鄉為京朝官者皆欲

以臺省處之適伯兄宮保公象乾方以薊遼摠督召為本兵而故事父兄官內閣及六卿者子弟無得居言路其見居職者或改翰林官故宮保欲暫歸為公地即來而翰林可得也公力爭不可以私恩宿君命遂平調禮部儀制司主事人皆服公之正而宮保公之友愛以為兩得之移疾里居久之中忌者以京察調外補江西按察司知事未赴再遷禮部精膳司員外郎聞路太夫人病急請歸路公繼母也時三原戶部來公復名善醫來

方筦臨清倉遂躬冒冰雪馳四百里邀之來視比至病
已急乃禱於嶽祠乞以身代母命太夫人聞之為之感
慟欷歔至歿服闋補本部儀制司陞按察使副使備兵
淮揚已巳通州奸民亂猝起聚衆數千燒劫豪家勢汹
汹及官府公自泰州馳赴之擒戮其首禍者數人事遂
定既以叅政督蘇常鎮糧儲道平漕卒之亂於俄頃民
不知變其持重能處大事概如此陞河南按察使司蘭
陵王母劉誣許許州諸生五十人巡撫下其詞以召捕

公爭之百端得止於是宗室驕行縱恣於郡縣賴公勢稍戢為按察使經年所部稱平遷浙江右布政使司冬左使姚某入覲公攝其事時崇禎十有一年也是時寇訔歲飢上計吏視賦入為殿最唯謹姚至京以解征缺額下獄公急勅主藏吏籍所貯悉諭之吏辭以考成不便公曰若所言吾豈不知顧姚事急吾視事日淺即不及降秩耳姚禍且不測與人同僚瀕危而忍秦越視之乎于是擇吏趣解到部課如額姚遂得釋還而率其子

弟頓首謝門下曰微公吾不復至此吾餘生皆公賜也起相持手泣數行下公為人寬中及見義勇決不擇利害為趨避然終不為崖異嶄絕之行其以京察降外也時羣小朋比攘臂力翻辛亥之案因坐公以浮躁公在家聞之怡然曰此輩自圖報復耳非朝廷意於吾何損或謂公方為部曹非時所輕重故其言云然然余按辛亥京察其首爭金明時之調外者刑郎秦聚奎也於是朝士意皆有所左右門戶角立蠡起東林中如丁元薦

李朴者皆以郎官出死力爭之為黨人切齒數年間奏
訐紛然如所謂秦派淮脉崑宣之黨擁帶爭雄諸不根
之說見之章奏者猥瀆煩瑣無復人臣禮自丁巳察後
衆正氣落不十餘年間而黨釁成矣其延及於崇禎之
末南渡之餘尚忍言哉小人之貽禍昔人所謂吾黨當
分受其過者若公處通塞之際蕭然若無事使搏擊之
爪距無所復施舍射之竊發不得以中豈獨既明且哲
以保其身亦謀人國家者之所當取法也公未衰致仕

有子四人諸孫今侍讀君士禎為某言其季父死節事甚烈則公子御史與盾也御史忤執政歸里聞甲申三月變搯擊曰吾父老矣且致仕久吾不可以無死乃與其妻子孺人子士和同登樓縊死于是公益絕人事自號明農隱士門闔謝賓客不為通雖郡邑長吏屏車騎到門匿不與見先為自祭文飾巾待盡而已生平喜淡泊室無媵侍盛夏整衣冠危坐讀書不輟常舉唐柳玘言誠子孫無矜門第務力學為善故其家累世貴顯至

於今尤盛卒時年九十三

謝工部傳

公既歿之明年其季子景昌走太倉求吳祭酒為其懸
綽之辭而屬傳於余既歸而請之者再余辱公愛至厚
微景昌之請其能已於言乎公諱泰宗字時望別號天
愚山人明崇禎丁丑進士為漳浦黃公道周所得士先
是庚午黃公主試浙闈得公卷而竒之以同考摘挾被
放後七年應禮部試復出其門黃公耿介名臣公以文

章兩被知遇益砥節自厲謁選得番禺令番禺蒞省治俗澆務殷公下車振刷威德並行盤古十八峒者百餘年逋寇也制府數奉詔征之不克其魁蘇鳳宇遂自稱王犯境及公蒞任制府即檄為南路監師合軍督勦而公時出奇計遂擒得鳳宇以歸賊既平叅將某者懦而倖功欲戮降數百人會公將白事制府某前以金盤玉帶為壽戒即入勿言公峻却之而極論其枉降者得釋叅將以降級去於是制府論功遂上公軍功第一始公

少時受學於其季父廉使公廉使公名渭為人雄毅有智謀每讀書暇即與公講論孫吳兵法後涖蜀受命討奢首深入賊營數百里嘗露宿洞中背噤痒覺寒甚寒裝盡濡夜半移軍去取火視所卧處則冰上也卒以是成功而公之監師亦露處谿洞者數旬或見繞山火光起部曲盡驚公不為動曰此必賊焚巢自遁耳覘之果然蓋其所用兵方畧得之方伯公者為多以功擢工部都水司主事旋中蜚語謫福州幕署泉州司理時天下

所在騷動山海之間鉦鼓沸然公帥吏卒乘障巡徼無
虛日故相黃公景昉行道遇之從輿上舉手嘆息曰安
得如吾謝侯者數輩則東南安枕矣踰年陞南安府推
官值亂解組歸順治三年

王師下東浙督府張存仁疏薦浙才六人於朝皆以疾
辭公即六人之一也公即屏山中益深自晦匿日著書
賦詩自遣其天性孝友予少時館其家見其兄弟間日
召客飲飲即連晝夜不輟或夜久聽鐘鳴客皆散去公

復呼家人起邀客還坐酣飲久之視庭中日復奄奄欲
落矣亦未嘗數數課其子弟顧其家無長幼無不謹勅
力學者然自予別去十年間公兄弟羣從大半沒其賓
客酒徒亦多死亡者顧獨與其母弟時素把盞相對日
黯黯不樂予去年過之公以久別予置酒歡甚未幾予
意闌欲起公挽留之不可則對案默然徙倚而後罷雖
予自今猶恨之公在閩時嘗携得黃公所著書兩篋後
因亂失之時對客嘆息大抵公之才不盡見於用其已

試者略與方伯公相上下而其至老好學不倦與其立身梗概庶幾無愧於漳浦之門人者子四人景昌諤昌從予遊初公歿時無疾方對客飲須臾欠伸索茗盡數杯即逝景昌為予言之如此

董公傳

六經之書皆所以垂教而易詩之傳最廣詩之變而為騷為賦為歌行近體多羈孤矢志貧賤之所為作故雖避世之士長往而不返者尤好之至如易遭秦焚書之

後僅以卜筮得存自後陰陽占驗之說益繁莫不假經設誼依托象類其說至詭譎不經而司馬季主嚴君平之徒多傳用其術溷跡隱見之間故夫易與詩二者之教此山林隱逸之士離世而自全者所樂取以自託者也而易之及人也遠故君子尤重之予邑往有廉使陳公頤正善易學旁及風角遁甲之術無不精詣嘗夜泊淮河見寶光起水上心知其有異筮之曰是宜得寶鼎即令善泅者蹤跡得其處久之以一鼎出款識蒼黝公

識曰商周間物也遂携之歸其他雖家人米鹽瑣屑一訊如響同邑夔州守楊公汝昇得其術值奢首煽亂賊發即知之掩捕無不得者時相傳以為神至今其遺書猶有藏者董公者隱士漢孝子黜後黜至孝舍旁忽湧溪水甘取以奉母至唐開元改邑為慈谿以孝子故也董公少而受易於其婦翁吳公遂屏棄舉子業不事卜易市中意專在於導人為善凡與人言利害必以其事推之教人趨吉而避凶一依於正道後事應亦輒如其言

以此遠近坐至錢滿座間隨手以散貧者所留餘取廿
脆以奉母公弱冠喪父後母龔性惰急凡事必長跪請
命間有所拂意不能即解者走請諸親故以解之嘗病
癰危甚號天願代為之再吮而旋愈母大感動於是邑
人皆以孝稱之先是董氏有遠祖會稽縣尉墓久沒荆
棘中公按家譜得之表石墓左尉後見夢於龔曰汝子
純孝施及於吾吾當有以報當是時陳楊兩公家稍中
落矣或曰陰陽之家天道所忌然公至子乃逾盛公四

子兩中進士長允升直隸淮安府知府次允茂福建叅議公前後受四封綸章稠疊皆言其孝感然性真朴不好為富貴容初隨養長公莆田後一至淮浹月返曰無久溷汝長公為治園所居側不時至其處率手一編坐吟小室中足未嘗一涉公府幅巾杖履逍遙城市遇少年子弟與之談笑立踰時乃去故人無知不知鮮不樂敬而親之其誠子居官以廉潔忠厚為本後兩公兄弟所至留去後思人亦以是多公卒時年七十有五自公

父子歿後數年天下始大亂長公子嘉餽於庠當需次吏部輒棄不就獨絃哀歌於荒山大谿之間人莫測其所以也顧其詩往往流傳人間故董公歿而其後又以詩著公諱時彥字叔元

先叅議贈太僕公傳略

高祖諱國華字邦實別號甬洲年二十四中嘉靖丙午鄉試丙辰舉禮部以憂歸己未殿試賜進士出身授工部營膳司主事時三殿經始公賦功庀具省度支以萬

計遷本部郎中分司治張秋決河陞河南按察使司僉
事轉陝西布政使司右叅議時鑛寇充斥梗商洛間劫
略吏民為害所在逐捕不能得公從容指授方略渠帥
授首陝東西四千餘里威懷並著無何中忌者摘判常
州稍轉南刑部郎中歷廣東按察使司僉事公仁心惻
隱前後治請誠多所平反尤潔已自持粵有土司為怨
家中傷械繫獄公鞠得其寃出之其人感泣謝去數日
橐千金來公峻却之曰吾豈以貧故喪吾生平哉公性

雖樂易然見義奮發不能以時俗圓轉附和以是再得
斥遂終身去官不仕去而苗民思之為立卻金亭亭至
今尚在公宦遊二十餘年持節河南北關輔粵東皆仕
宦膏腴地然歸家環堵蕭然舊田四十畝分毫無所增
宗家故舊乘間言何故累却餽遺不為子孫計是時太
常公初成進士公笑曰此吾所以為子孫也使吾用闔
昧得金今日中詎得復見此耶太常公改戶科之三月
為萬歷十三年首抗疏爭鄭貴妃冊封且請早定國本

疏入未下中外傳上震怒禍將不測語聞至里中家人
皆憂泣公謂其同年友御史顏公鯨曰吾垂老不復意
兒能作此等事雖受竄殛不恨矣顏公故忠直名臣時
被讒家居舉酒慷慨起屬公曰公有子能死諫闕下公
不以戚諸懷反用此慶幸方今父子以名節著聲如公
幾家此吾所以為公賀也遂飲極歡而罷後太常公量
移餘干令迎養三年卒得年七十太常公親為志藏於
墓公仕世宗朝時朝廷綜核名實縉紳之士敦尚風節

顧惜清議公律已清苦尤甚為里中士大夫倡時有某
某罷官歸里被不飭稱諸公每公事期會縣廷中覘知
某某先在便疾驅返或某某後至知廷中有人亦望風
避去至今長老猶能傳之公加惠鄉里尤渥既歿民感
公父子兩世恩德請于官建祠城北環湖水為尊德祠
歲時父老子弟致祭不絕泰昌元年太常公被召起以
覃恩贈太僕寺少卿長子諱應麟即太常公別有傳次
諱應鳳郡文學博學工文善草隸書名于世玄孫宸英

奉祖戶部公命謹著傳略如左

先太常公傳略

先祖戶部公嘗命宸英曰汝曾大父筮仕先朝功在國本歿之日山陰念臺劉公嘗誌其隧道之石也予欲載詳之家乘俾我世世子孫無忘先烈是汝之責也宸英受命惶悚久之不敢屬筆今先祖捐館八年自後宸英載經創痛神思恍惚及今不自勉厲闕先德不著格尊命不就罪戾滋甚悔將何及謹按行狀志銘考之遺集

并所聞於祖父者掇拾書之以俟世之君子有所採取而潤色焉先曾祖諱應麟字泰符別號松檠為嘉靖己丑進士累官陝西叅議贈太僕卿諱國華號甬洲公長子公中萬曆癸酉鄉試癸未進士選翰林院庶吉士改戶科給事中是時萬曆十三年九月也至明年二月有旨加封鄭貴妃為皇貴妃先是壬午年皇子生為恭妃王氏所出時鄭妃寵冠後宮已三年矣初姪邠哀王上與之戲逐而傷之生三月不育鄭恚甚上憐之與私誓

即更舉子則立汝子為東宮至皇第三子生賚予特厚其父揚言於外謂神器且有所屬未幾加封之命下中外危疑益甚而禮部已具冊封儀注將上矣公憂之闔扉飲泣草疏家人守之不得就一日晨起入垣中鎖吏繕寫成即上疏曰臣惟正名定分國家所以安別嫌明微君道所以著事有出於無心而繫四方之觀瞻發於一時而關萬世之綱常此明主所亟欲聞臣下所為耿耿而不容已於言者近見大學士申時行請冊立東宮

奉旨元子弱少俟二三年舉行復覩聖諭封貴妃鄭氏
為皇貴妃竊謂禮貴別嫌事當慎始貴妃以孕育蒙恩
豈曰不宜但名號太崇其於中宮不已偏乎且貴妃所
生固皇上第三子也猶然亞位六宮則恭妃誕育元嗣
翻令居下揆之倫理則不順質之人心則不安傳之天
下萬世則不典非所以重儲貳定衆志也伏乞俯從末
議收回成命以協輿情臣愚不勝大願且臣之所議者
末也未及其本也臣愚以為皇上誠欲正名定分別嫌

明微莫如俯從閣臣之請發德音下明詔冊立元嗣為東宮以定天下之本則臣民之望慰宗社之慶長矣疏入上震怒抵之地乃徧宣二十四監掌印至諭所以冊封貴妃非為東宮起見而科臣指斥過甚不堪之意以手拍御案幾裂中官環跪叩首上即欲批旨意在予杖而手顫不能御筆如是者三怒稍解奉旨冊封非為別故因其敬奉勤勞特加殊封立儲自有長幼姜某沽名賣直窺探上意著降極邊雜職云云得廣昌縣典史去初

公疏上次日即下中官傳某親自領旨甚急左右皆怵
公懼有不測盍先服藥往公固不肯聞命即日策蹇出
都門國本之議自公首發受嚴譴凡在京九卿科道及
南都臺省申救者疏凡十數上不省而主事孫如法科
臣沈璟至被杖幾死自後言者蠶起至於三案互發黨
議相軋垂六十年然自立儲自有長幼之旨出言者皆
得藉口以取必於主上朝廷雖厭之而終不能奪也故
事官降雜職者多投諜去鮮之官者公曰孰非君命耶

吾馬避之居廣昌四年量移餘干令丁外艱服闋至京
時太倉相求去公上書責其不宜乘機委卸詞甚切直
別載文集中首相同郡沈公一貫公館師也嘗為人言
皆吾君子也語傳播遠近公值之朝昌言曰國本未定
諫官相繼得罪公何以謝人言沈公曰事至此即十張
子房亦無益公曰如某所見正不須一張子房祖宗養
士二百餘年豈無忠臣義士願以一死報朝廷者公但
主持於上諫臣以死爭之於下殺一人復一人進殺至

數人不止皇上亦且寒心此時公出而徐以一言回之可不勞而定今大事之去留在相公公奈何遽出此言失天下望時聞者皆為頸縮沈公愈怒退復草疏尤激切其略曰臣既以身許國而陛下復以信許臣臣之初心未竟者十有六年陛下之大信未成者亦十有六年事在悠悠猶堪有待危機已著更待何時故臣不死不後欲以此日責大信於陛下以畢臣之初心且惓惓以釋危補過望陛下非得已也為國家安危慮為萬世綱

常慮至急也初臣為諫官因冊封皇貴妃有慎封典重
儲貳之請陛下降旨云立儲自有長幼以臣疑君賣直
而斥是臣之罪在不能仰體聖心謫有餘辜也繼而禮
官沈鯉有免斥言官之請陛下降旨云因其寘朕有過
之地故薄罰示懲是臣之罪在不能仰成聖德謫有餘
辜也信斯言也陛下惟恐見疑於羣臣以得罪於天下
後世將朝更夕改之不暇不意陛下之過舉猶故中外
之人心轉疑初謂二三年舉行今且五之矣初謂睿質

清弱今且強壯矣初謂先冊立後冠婚今則反欲倒行
矣夫冠婚可委曰清弱冊立何嫌於強壯愆期不舉當
機復靳假手於人借言於激人將有以窺陛下之微矣
又奚怪乎盈庭之嘖嘖也彼偃仰風議之人方且怵威
投鼠甘心煬竈坐視陛下孤立於上徐視陰陽之定而
坐收其利即有曲意調停者亦不過就中轉移望風瑟
縮殊未聞有招不來麾不去如古大臣之風者且此非
特不忠於陛下而已究豈有工於為官掖藩邸計而善成

陛下之愛者哉夫有却座之諍始免永巷之菑人羸之
鑑燕啄之禍非不炯炯也陛下奈何溺衽席嗜美痰甘
為子孫賈無涯之禍而不顧耶夫弓不抑則不揚矢不
激則不遠士不臨禍亂則忠憤不激烈以祖龍之酷尚
奪氣於茅焦之解衣危論以嬴秦之暴士尚有建節積
屍闕下而不悔陛下欲以威劫正人而成其私竊恐威
未及殫而大亂已成可不戒哉嘗讀史至晉獻公事重
有感焉夫獻公亦中才之主其天性好惡非與人殊必

且以並后匹嫡為無傷者而孰知用意一偏禍延再世社稷幾墟故人主之託身不可不慎託身賢士大夫不引而致之明威不止託身於宦官宮妾不引而致之於亂亡不止陛下神聖英斷御一皇貴妃何足為患然亂自女戎三代已然其寵已極其度必移今道路之言日有聞矣咸謂冊立不決由皇貴妃牽制所致甚者以為窺伺璇宮懷逝梁之非望又甚者以為齟齬震器微壓紐之適然揆之理勢或非事實迹其隱微夫豈無因萬

一外戚中涓有以邪謀綴皇貴妃者恐皇貴妃不得自由也萬一諧臣媚子有以家事悞陛下者恐陛下亦不得自察也臣又思之陛下動以祖宗為法而尤憲章世廟為兢兢夫大本之建列聖皆豫唯世廟差晚耳則陛下所法宜何適從哉若必欲取法世廟雖不建儲猶不殫令景王之國以絕羣疑而杜覬覦此又不定之定不立之立也獨不可法歟夫事關宮闈則夫綱宜正事關長幼則父綱宜正事關臣庶則君綱宜正嬖倖可從兩

官何為不可從冠婚可行冊立何為不可行軟熟不激
忠言何為而獨激此陛下所不能自解於天下者也欲
天下之無疑已難矣哉臣前為言官而言以職諫也今
不為言官矣不當言矣然臣之官可奪而臣之志不可
奪臣待罪五載不忍遽去臣非有所戀也受陛下之恩
深義不忍去而坐視國事之日非陛下倘有感臣言即
發德音冊立冠婚一時並舉臣雖死猶榮若罪臣出位
加臣沽名則臣已席藁括髮待矣斷不願與中立觀望

全驅保妻子之臣同視息於天壤也疏上留中公欲再
疏爭之沈公鯉不可挽公手以付公座主教公文楨曰
君家好門生宜善成之教公曰子不欲立東宮耶即欲
立東宮不宜過激乃止執政既銜公嗾主爵無得隨例
補除每用啓事特奏之而上之始譴公也有不許朦朧
陞用之旨特疏公名於屏風執政覘知之故啓事上上
見輒嘿然凡待命七年不報辛丑十月有詔立皇長子
為皇太子公喜遂歸杜門垂二十年人皆惜公之不用

以去且老公則謂吾身雖廢棄而其言幸已行行而宗社之計定天下以安是上之知我深逾於寵祿我也故雖貧無儋石儲而未嘗有愁苦不自聊之歎光宗立起太僕寺少卿御史逆案潘汝楨者舊為邑令多所乾沒公諷之亟至成嫌隙伺公抵京則陰令吏科薛鳳翔劾公老病失儀宜致仕鳳翔亦逆黨也公曰吾此行欲一見新君哭舊君耳豈能與若輩爭進退哉朝廷方下部以國本建言舊臣命從優議覆而公遽引疾去矣公釋

褐庶常改給諫服官任事僅四閱月而謫謫三十餘年
至京坐席未煖旋報罷蓋是時逆焰潛萌相與譁張為
患者蟠結於中外如潘薛之輩其醜正嫉賢而欲亟擠
而去之者宜也然公忠義偏塞所得自見者國本一疏
耳猶遲久而後定中扼於柄臣後尼於羣小至不得使
其身一日安於朝讜言碩籌鬱而不抒就其中如福清
吉水諸公皆坐視顛蹶歎息而已不能一引手救何論
其他天啓之敗政至於網罟塞路讒夫高張於公之一

去兆其機矣此豈獨公一人之不幸哉識者謂公不去必與於清流之禍小人之忌公適所以為公而安全之也然豈公之本志哉公尉廣昌日進羣士而課之學宮延名儒秦先生為之師士苦府試回遠則言於臺竟以名達學使者著為例邑有白狼為害傷人積千餘公檄於邑城隍神捕得遂殲焉三淫祠歲殺人男女以祭否則巫言且為禍公下令焚其祠而民無譁者令餘干尤多異政有孝廉訴妹殺於其夫者夫監生某再殺其婦

而及於孝廉之妹公受訴立至殯所將啓棺驗焉陸拊棺哭之哀公亦心動至夜夢婦被髮來目盡出手招兩乳迸裂血流殷體且以告其夫曰不爾吾甘受罪及啓視則席藁以生納於棺宛如夢中所見者夫詞服而前所殺之兩婦其寃并得雪宋丞相趙忠定公汝愚墓道為守塚方氏所侵方宗彊其子孫茹恨不敢言公聞親勘還之為文以祭忠定未幾雷猝其人擊而斃之於墓下如倒植然樹碑禁民佞佛溺女所活民女子無萬計

公不以謫官自處盡心政事廉潔明斷而本之以仁愛故凡所為兩邑興革利弊不可殫述而民皆得蒙其利歌思之至今此其尤稱道人口者公家居三十年坐卧一小樓於書無所不讀著五經緒言史論手緝二十一史平衡錄醫學地理書各數種尤精於易有周易容光易會諸書皆晚年心得行楷法顏歐所讀書皆手書之累數千卷天性剛直遇意不可若雷抨矢激人無得撓者事過恬然不貯於胸待子孫威嚴若朝禮動必以法

於鄉黨宗族以恩通籍四十餘年守先世遺產數十畝
分毫無所增益租入不充而常欲節衣食以給貧者位
不過四品閭門養重而人常翹然如利澤之及己萬厯
季年稅使四出令韓盡括邑中契券所搜索盈萬金猶
不已將開告訐之風名為覆實意主於破碎富戶人情
驚怖思變父老頂香至門求解於公公謁令使強出其
契事得止邑人感之為立尊德祠於北湖孺尸祝之而
令遂切齒於公令故潘汝楨同里戚黨故汝楨之排公

也益力然公自再詣京師目擊時事遂無意於用世嘗
寓書族人曰吏部以掣籤官人兵部以封婚媚倭大臣
皆持祿養交日夕如雷震轟然在頭腦上脅息無敢出
一言為天下者中原陸沉恐不難致吾此身不可以再
嘗試矣懼人怪吾狂言誠勿出其書自當時觀之宜士
大夫之弗以為狂者百無一二也孰知其應在十數年
之後若親見其事而言之者然不幸公竟以守困老矣
嗚呼使公之得行其志其設施亦未可量也公三子長

諱思簡戶部司務次思素思復皆諸生崇禎十三年戶部公請卹闕下從子御史思睿亦上言之有旨賜祭葬贈太常寺卿蓋異數云

李節母邱太孺人傳

婦人有從夫之義其不幸當死喪之威截髮髻面之死靡他此其節烈見稱者也其教子若雋母之見決獄多所平反則喜嚴母之以天道惡殺為誠此則明智最優者也二者俱足以砥淬末俗流光彤史今李母邱太孺

人備是二者之德嗚呼是安得而不紀也哉孺人戶部
主事某女孫大行某女而今庶子掌坊事鎧之母也歸
先贈公文學靜孺公公與其伯仲俱以文章有名於時
世所謂淮陰三李者也孺人以孝事姑以和接娣妯而
以勤儉治其家故自孺人之歸贈公家務日飭而兄弟
師友歡甚交游亦日益進年三十遭變躄踊長號數日
水漿不入口姑丁夫人勉慰之以養姑撫孤大義得無
死次年會贈公伯仲相繼歿遺孤俱幼三嫠婦支持破

屋奉一老姑甘旨服物得無缺而丁太夫人拊孺人特
憐之曰此吾李氏孝子也及姑病侍湯藥喪葬如禮兩
姊似卒字其孤如己出焉順治辛酉庶子成進士得蜀
綏陽令母子不忍離萬里迎養於官至則命庶子廉得
縣蠹弊數事乃焚香於庭令次第革除之誠以母擅鞭
笞輕民命勿以絲毫取於民吾與若惟飲綏陽一杯水
耳庶子入而稟母之命出而與吏民相見有所施設必
曰非吾能為此吾母之教也即有所寬貸曰吾母不忍

於汝也如是者三年民既順令之為教化淪浹亦翕然歸譽於母曰非是母不能生是子已聞孺人疾劇父老爭醵錢集社神祠願減算十日延母壽琳宮梵宇建齋醮無虛日死巷哭聲沸天白衣冠持喪者三月喪歸所過執紼號送男女奠酒漿跪拜匍匐不絕於道傳之所謂豈弟君子者庶子當之要之孺人之所以致此者不虛也攷古史家列女傳當居何等或謂婦人考終善事不足書則書其尤異者自古甘棠之思有及其母者乎

即過而見思有若綏陽之民之於令之母者乎此而不
書吾懼無以勸天下之為婦貞為母賢及為吏廉者也
遂節其大概錄之孺人卒時年六十五生二子長樾次
即鎧論曰余從庶子於史館見其積學多聞而恂恂樂
易長者每暱就之不厭今年余將南還過其邸出母行
述請傳其事適左右以綏陽邑子書來啟視之猶稱母
之賢而惜其沒累累百餘言計去母歿時已十餘年矣
庶子方以文學當上知蓋異時不獨以其吏迹見稱者

也

周節婦傳

古所傳列女有苦守無子或有子不嗣者有子姓成立而身天闕天年不及終享者又有堅貞白首子孫不克負荷門戶零落以致終身茹苦而姓氏阻於上聞者彼其所得於天者已薄矣而人事之缺陷又往往為其鄉閭所不樂道以是勸懲不立而節烈之寥寥無聞於世無惑矣若林母周太君以二十一歲喪其所天時已舉

二子矢志不改親教子成立年八十守臣上狀受旌于
朝如故事九十三終子孫男女四十餘人死之日服總
麻而位哭者八人焉此於天為獨豐於人為無憾於世
為可勸於事為可傳者也先是癸酉年太君孫世榕來
京謁選以與余通家世好過予述太君事請為傳未果
今年四月俾來以行述俱且曰吾世父與父不幸皆先
吾祖母歿今求先生為序者亦以抒吾之哀云爾予聞
周氏為澄海望族太君祖諱某起家進士累官廣西按

察司副使父文學諱某娶方伯鄭公女生太君十七歸
文學公時文學祖戶部侍郎忠宣公與其夫人俱在堂
及舅姑兩世旨甘柔滑唯是朝夕之奉養皆以太君為
宜文學清羸嗜學過勞得疾不起太君以撫孤故忍死
進來終喪無笑容時長姒亦孀居命兩婢私舁篋金至
請以仲為後太君辭曰繼嗣應否有舅姑之命禮子婦
無私貨蓄此金何為者却之後姒改適而主其兄公之
祭祀必潔以虔以舅姑命也其課兩子也聞呶唔聲則

喜或見篝燈至丙夜則又急止其讀每私念文學以苦
讀傷性輒潛然出涕久之以是不忍過篤其子然終不
令子知也自鼎革後嶺外久困兵燹癸巳潮叛帥為變
太君被賊執將刃之伯匿樓上踉蹌下救會仲亦自城
奔赴母子相持哀號賊聞其節婦也憐而舍之前後寇
抄被厄者數矣闔門完聚卒無一及於難者人皆以為
節孝之報其卒以康熙壬申八月至次年孫世榕之任
藍田五年中治行日聞人謂太君之教有素報方未艾

也此所謂于天為獨豐于人為無憾者乎余為之傳不
惟其世好之謂亦以是為勸也已太君二子皆明經長
曰某仲曰某昌化教諭世榕昌化子己酉舉人見任藍
田縣知縣

碑

工部尚書睢陽湯公神道碑

工部尚書睢陽湯公卒于位其孤以其喪歸葬于某原
明年以官世治行來請銘余曰噫公之死宜得余銘久

矣爰按公狀又徵之太史而以余所立朝親見者備銘之石俾揭於墓道序曰公諱斌字孔伯號荆峴一號潛菴順治五年舉于鄉次年會試中式又三年成進士改庶吉士邸舍不避風雨常坐讀書不妄有通謁給事中蔚州魏公吏部湯陰王公皆以清節名於時每過門輒緩轡徘徊嘆息乃去甲午授檢討時議修明史

上言宜依宋遼金元史例錄南渡後死事諸臣執政詫其言疏上夜半傳

旨召至南苑人皆為公懼乃

世祖皇帝顧與溫語移時不以為罪也乙未

詔選翰林科道出任監司公得潼關道副使是時黔師屯成都漢中經略兵屯湖南關中徵發四至民逃匿十二三公下車約束每大軍至使人逆之境外無得入城總兵陳德之調湖南也至關欲留公謂二萬人坐食於此勢必不支然其母病不可彊遣也于是陳檄車五千輜騎報曰陳將軍實用軍二千其餘待折鏹以行公潛

遣人僦車二千而民率匿車河下還報車少將軍乃謂
公曰我自僦車盍畀我錢乎公曰甚善顧必以人量車
每車坐幾人使民知其不足而補之陳處傳令軍中公
乃出坐關門上揮士以次升車滿十輛即遣出關而河
下車皆集漏盡四鼓悉出無一人譁者因設祖道關門
外請將軍出將軍聞鼓聲大驚欲追還軍士公曰吾民
一散不可復聚且軍已出關不得入也遂倉皇去至洛
陽其母死留治喪匝月軍變焚殺上聞而關城以公故

得晏然無事未幾流民歸者數千戶歲早無麥而春夏
兵餉例支麥麥價浮於穀公請發倉穀以代軍帥以為
若是兵且變督撫徵麥益急公曰吾民乏食將為餓殍
公憂兵變獨不憂民變乎即發倉穀與兵約今歲無麥
食此明年將補支若麥而若以穀償官皆喜曰願如今
於是關西數千里麥征悉停兵民賴之公蒞事精敏訟
無留獄環境五十里聽質者皆不齎宿糧從卿士大夫
咨民疾苦隨罷行之或有以私干者見公輒縮胸不得

發嘗行勘荒遇雨止大樹下民朱欄其樹外時人以比
諸甘棠焉量移嶺北道叅政轄贛南二府甫三日清積
案三百餘李玉廷者明舊將以所部萬人入山為盜公
以書約降之未及期七日而海寇犯江寧公策玉廷必
變計夜馳至南安設守畢而寇果至見有備遁去隨請
於制府用將士分屯要害五六處誠令固守毋妄動玉
廷所向與兵遇遂就擒其黨亦解散公持身清潔所至
欲為地方興利除弊其志甚銳其才足以濟之而一本

之於至誠故上官雖時有所牴牾而終釋其意不疑以
有成功自潼關移任僅攜僕二人往返八千里既定大
亂念封中憲公病甚即謀歸省督撫惜之例外官若非
特薦不起公故有異母弟甫六歲督撫欲令權宜以終
養請公曰奈何以此欺吾君也且謂無兄弟而歸吾父
必不樂竟以病告罷年纔三十三云初明末寇陷睢陽
公母趙恭人以節死順治間始得旌公之歸也日侍中
憲公及軒恭人色養備至而為趙恭人建祠于所居西

徧每朔望謁家廟畢必至祠瞻拜歛歛里人私識其來時刻先後十餘年未嘗少差丁中憲憂服闋走蘇門孫徵君門請受業與同志為志學會講求玩索所養日充粹官長稀見其面有同年任方伯者見郡守問公近狀郡守對言實未聞有此人方伯益嗟嘆不已

今上戊午詔舉博學鴻儒司寇魏公以公名上試補公翰林院侍講同纂修明史辛酉充日講起居注官轉侍讀典試浙江壬戌充明史總裁次年直講筵纂修

兩朝聖訓公先講一日輒正襟端坐潛思經義比入講
敷陳詳切務以誠意動

上聽歷左右庶子擢內閣學士兼禮部侍郎居四月會
江寧巡撫缺

上命公往陞辭

諭以朕非忍出卿于外顧江南風俗奢靡訟獄繁夥以
卿耐清苦特令往撫之冀有所變革因

賜鞍馬一綵緞十白金五百兩比行又入見

上徹御饌賜之復

賜御書三軸曰今當遠離展此如對朕也時

上將南巡急抵任至則文案山積數日迎

駕北渡江就舟中判斷晝夜不假寐者六日而積滯盡
清公扈蹕至江寧

上再賜御書一軸蟒裘羊酒傳

旨令逕歸署蘇松舊患積逋相仍有司不滿歲即呈誤
去以故皆不自愛而私規近利上官陰持其短索賂益

急虧公帑繫訟者累累公至則進州縣吏盡斥其所為
且曰今與若更始苟稱職吾不吝薦引即不能以考成
罷歸猶得完身名守墳墓奈何日坐堂皇引前官妻子
對簿勘產反蹈若所為皆頓首涕泣曰公活我又誠司
道郡守不得責屬吏餽金皆指天自誓曰不敢于是除
耗羨嚴私汰清漕弊汰蠹役行保甲革鹽商匣費一切
皆以身先屏絕請託居數月乃劾其貪暴尤甚者去之
自制府將軍下皆傳相戒不受所屬一錢奉使京朝官

往來過客迅棹疾去停傳無斗粟之費吏治廓然大清
公之陞辭也

上諭以積逋當以次漸理故公為政先謀寬民力興教
化培植根本為務嘗請改並徵積逋為分年帶徵免十
八九兩年灾欠減賦額寬考成豁逃丁調驛困免蘆課
買銅除邳州板荒捐明萬歷年所加九釐餉聞有灾傷
弊政不問部議可否疏立拜發亦恃

上之知其誠悃故見事無不為所告無不盡也初至報

睢寧沐陽邳州災

上為之蠲賦數千兩又報泰州災並永蠲前二年賦次年淮揚徐大水奏免賦十餘萬兩又盡免高郵寶應秦州興化鹽城等州縣賦復幾十餘萬嗚呼

上之信公而加惠於民至矣公所以將順而宣布之者豈非所謂

主聖臣賢千載一時者歟公猶以救荒之法為未備乃發常平倉粟及丐將軍提鎮權關輸粟往賑又檄布政司

以庫金五萬告糴江西湖廣或謂公宜先奏聞公曰吾君愛民必候

旨往糴民不溝中瘠乎遂遣兩同知行誠之曰若至極言淮揚飢狀米斗一金令遠近聞之糴財及半運未還而大賈爭泛舟下江市中斗米直百錢而已後歲熟償庫國帑無損而民所全活者以億萬計有司請報湖蕩蓮芡公駁還固以例請公曰例自人作寬一分則民受一分之賜且蓮芡或不時熟一報部即為永額後欲去

之可得乎凡禁遊冶驅優伶倡伎嚴市肆淫辭邪說之
流行刊布者禁有喪家無得火化及久停柩者令下一
歲報葬者三萬餘棺五通神者祠廟遍江南巫射利誕
妄士女怵于禍福奔走如鶩公取其像投湖中民始大
駭已而妖遂絕廣立義倉社學聚民講孝經小學月吉
讀

上諭律令舊俗丕變而或勸公以講學者公謝曰吾知
盡吾職不知講學也又請為公立書院公曰吾不講學

安用書院蓋公之學主於隨處體認天理其要歸於自得而外貌闇然不自矜飾故人非久相識者不知其嘗學道也其學於蘇門也師法姚江而不以先入之言為主故於濂洛關閩之書尊信之尤篤與夫世之標宗旨樹藩籬以自炫驚者迥然異趨唯其一本于誠而已其樂閒靜甘淡泊天性也居官不以絲毫擾於民夏從質肆中易芋帳自蔽春野齋生日採取啖之脫粟羹豆與慕容對飯下至臧獲皆怡然無怨焉民間至以公姓為諧

語謂之豆腐湯云蠲漕及地丁分年帶徵以部費為名
前後派銀四十餘萬布政司屢以為請且為樂輸公不
可請之亟公怒將發其事吏叩頭謝久乃已及奏銷部
核當罰俸特

旨免之歲大計藩臬託治裝遷延無行意公曰明日不
行行劾汝矣不得已遂空手入都而他部每郡縣坐勒
費至三四千金不止公見屬吏必霽顏色告以

君恩不可負民命不可殘懇懇如家人語故其下皆畏

而愛之方整刷未竟會

上諭吏部特授公禮部尚書管詹事府至則命公坐講
問路所由及地方利病公以鳳陽災對

上遽遣官往賑尋充經筵講官總裁明史與會議

上所以任公者甚至然公嫉惡過甚在吳時已有不便公
所為者以為形己之短而忌之而公亦已久勞簿領精
耗神疲殿幄起居動見抉摘部覆革職者再降調者一
翰林院及詹事府公劾者皆一賴

上寬仁曲全僅鐫級而已公請養母求去不得又自惟
奉職無狀久留不可闔門屏營席藁待罪

上特宣入則涕泣叩頭請死

上惻然為之動容未幾遷工部尚書方受事而病已不
可為已

上遣御醫診視疾稍間奉

命詣潞河勘楠木感風寒歸遂大困臨沒戒其子曰孟
子言乍見孺子入井汝輩須養此真心令時時發見久

之全體渾然可達天德若襲取于外終為鄉愿無益也
復以

聖恩未報母養未終為言挽子溥手以指畫草遺疏謝
上五字遂瞑

上聞遣學士多竒翁叔元奠椒酒

命馳驛歸以尚書禮祭葬公忠孝廉潔出於天性臨事制
義充之學問平時見為迂濶而當幾磊磊立斷馭下凜
不可干而所在務寬小過撫吳時行取縣令二人于

功令不當薦部議駁還

上特破例用之今都御史郭公琇其一人也蘇有高士徐枋居西山四十年不入城公屏騶從步行造門枋終不肯出公嘆息而去時議兩高之其聞

召將去吳也百姓啼號罷市十餘日投匭斂錢謀叩閭不得則老幼提攜奔送自吳門至江北千里不絕于道其沒也無知不知昏哭曰正人死矣人謂公撫吳庶直似海忠介而去其煩苛精敏似周文襄而加

之方正至其學問純粹有體有用蘊之而為道德發
之而為事業而人猶惜其用之未盡則有非二公之
所得而與者矣其家居室無廣厦侍無姬媵日以讀
書養親為事所著有洛學編二卷補睢州志二卷詩
文二百餘篇公移條約十餘卷藏于家享年五十有
九元配馬氏封恭人子四人溥濬沆準女三人皆適
士族銘曰

惟湯於世寬始祖遇明之興奮厥武積功神電衛百戶

孫襲千戶其諱庠自滁來遷家睢陽易守岷衛祖烈光
六傳希范趙城丞子敏孫契州諸生三世棄武名一經
尚書生也為國器性耽典籍弱不戲學播仁種耨以義
朝出蓬山暮華陰遺愛衍溢留虔南華山高高貢水深
歸棲子舍矢不出再返玉堂詎意必掌

帝絲綸預機密

帝憂南顧余汝賢公出整頓未兩年民蒸俗熙吏恪虔
帝曰汝歸司胄教夫彼己氏豈同調蚋舍狙伺術已巧

事有變遷理則那

主恩前後無偏頗千載視此石嵯峨

兵部督捕理事前浙江道御史徐公神道碑

本朝有名御史曰徐公越者其仕在順治時及

今上康熙之十三年間而人望之若前世人其僅遷
一官以謝歸其里未久也而人想其言論風采以為非
耳目所常得聞見是不可以無傳也蓋余伯兄大司寇
嘗為之文以勒諸幽矣而嗣子覺復以墓道之碑跣請

於余者以余兄弟知之尤詳也敢不敬諾公字山琢存
菴其別號系本太末世家句章明洪武中以軍籍徙淮
安衛自曾祖某以上皆不仕祖某父某誥贈中大夫祖
妣王氏杜氏妣楊氏王氏同贈淑人皆以公故公舉順
治九年進士外艱服闋授行人司行人十七年

御試擢浙江道御史移疾歸康熙六年補山東道御史
出尋鹽河東還臺內陞仍在臺久之補兵部督捕理事
官旋請告遂不出公在臺最號敢言順治末兩年中疏

九九上自康熙六年至十二年共五十疏而于治河事
宜尤詳論治河疏先後凡十一上

先帝時請不時召見大小臣聽令反覆指陳以備採擇
且曰臣願

皇上留徙死之刑以待巨奸大佞其撓逆鱗者當稍示
以優容寬好名之禁以厲中才下士其冒天功者則國
有常典一時傳誦以為名言康熙七年

駕將幸口外極陳地震之異乞勿輕動以順天意

詔是之越四日又降

旨褒因徧諭羣臣自後事有關失宜如前直言無隱不
憚改更河南撫臣請急賑汝南諸郡部議以未報災不
允公疏不早報災罪在有司百姓何辜而聽其茹糠咽
皮生填溝壑乎奉

旨責其不報者而令趣發賑如御史言諸論川湖採取
楠木累民論奸商大猾宜寘重法論經筵不宜久撤論
官差不宜多員論屯墾之兵宜早安輯論五城棲流所

宜修緝皆得

俞旨復因亢旱祁禱請寬逃人株連之罪則和氣自應
事雖不行時論韙之先是州縣兩歲開徵本以四月九
月有請如舊制者部以國用未足為言至是公言聞各
省預撥餉銀除足備一年外存留尚多此而不足直待
何時始足乎請如舊便十年會睢陽水災

上遣大臣行視公請于各州縣多分設米廠使貧民免
失候之苦擁擠之患然後日日給一升每三日一放米

以百日為率則一石之米可活一人百石之米即可活百人雖多至十萬人亦止費官庾十萬石耳使者與有司宜遍歷躬視勿急限還期勿預定米數疏入

上大喜本不下閣即命賑濟侍郎田逢吉酌行而并九年八月緩徵一疏

特召面陳反覆數四

天顏愈和公應對詳敏在廷無不瞻聳者既內加四品俸益自感奮十二年糾定南王女孔四貞其夫孫延齡

與撫臣互許方在對簿不宜許其入廟

上曰此女

太皇太后所愛對曰即公主干憲臣亦須糾

上動容可其奏家居十二年唯屏跡讀書人稀得見面
沒以二十六年十一月某日也年六十有八配李氏贈
淑人繼任氏子覺候選知縣女三人皆適士族孫四人
曾孫一人以某月日卜葬于某原公居臺首尾七十餘
疏而家本淮上目擊淮黃衝突居民昏墊漕道通塞之

故其言尤多時有用不用然識者莫不謂然而以其不盡用為可惜銘曰

黃入運河水緩沙滯天妃一閘以時啓閉公上書言宜如舊制加之挑濬漕行其事公又上言分黃導淮黃流漲遏閘不受淮則衝齧高堰而高寶其灾開支河地於黃家嘴弱黃分導淮不為暴公始上疏

旨未及降桃源湮墊決三百丈河臣叫呼公悉其故自三年前河水北衝南岸歲修五丈險工幸不相偪而噤

不請塞清河洲長裴口倒射今者之決理所必極河北
數州積尸浮漂民之孑遺顛于為巢府帖旁午泝夫採
柳採柳一束糜三百錢泝夫鵠面動集數千財殫民盡
國何有言官為採募於事實便次及歸仁隄宜修復滾
水之壩季馴倡築具載成書臣所諳熟石鐵灰椿於官
取足明年七月三疏同日一請修高堰高堰之修係生
靈百萬高堰一決河口必闕河口之闕海口必塞上潰
下塞是謂無策內遷留臺復陳河患夾沙黃流積淤成

坂河身岸齊民其阡危孰為議者請開遙堤遙堤之設
曠土則宜城郭接壤安用此為而况民舍墳墓俱隳為
今之計莫若汰挑澗注芒稻畚鍤之勞勿惜勿遲黃淮
滔滔上支勿治孰濬其尻臣昧死言以備芻蕘自公之
去執言盈廷

天子曰吁疇即余工公今既死詎復聞此吾書以告百
爾君子

銘

戶部右侍郎前福建布政司使櫟園周公墓誌銘
公諱亮工字元亮別號櫟園開封人先世有諱匡者仕
宋叅江西撫州軍事因家焉其後三徙定居櫟下至公
祖鴻臚寺序班庭槐遊大梁而樂之復占籍開封鴻臚
生子文煒即公父國子監生任諸暨簿公中明崇禎十
三年進士授濰令是時濰被敵圍久公以一書生乘障
親集鏃其身城以不陷事聞行取授浙江道監察御史
未幾京師破順治二年

詔起公以御史招撫兩淮尋改兩淮鹽法道陞海防兵
備道遷福建按察使踰年陞布政司右布政尋轉左首
尾在閩八年其以按察駐節邵武也邵武在萬山中嘯
聚彌山谷城外烽火燭天公權宜治軍事募敢死士日
開門轉戰谿谷間多所擒獲夜則獨坐譙樓上仰天長
嘯賦詩高詠衛士擊刁斗聲中夜與相聞事少間建詩
話樓祀宋嚴滄浪其上召邑諸生能詩者日與倡和境
內益安為右藩時屢奉檄歷署建南汀南漳泉諸道皆

數反側地人所顧却不敢就獨單車往來鋒鏑中百方
經略所至輒見紀故自內台出境及被劾還質質竟轉
逮復入都百姓皆扶老携幼頂香迎道左爭奉酒食勸
盡觴號哭聲竟數百里閩詩人高兆作四泣詩紀其事
初公以左副都御史徵上章言閩事報可又密有所建
白頗摘抉用事者驟擢戶部右侍郎而聞者咋舌曰禍
始此矣未幾督臣果飛章劾奏

詔赴閩勘比到前督已罷去按察使與五司理會鞠得

其寃狀列狀上中丞時久旱牘具雨大澍民為作歌曰
東卷雨云復逮下刑部訊秋朝審可疑故事獄上可疑
者報聞即釋而是時適傳

恩赦凡已論囚概減等公反以赦例當隨輩徙塞外待
春發遣緣

世祖遺詔免尋以僉事出青州海防道公生平喜為詩
凡按部所過山川風俗及臨陣對敵呼吸生死居間召
客讌飲詼調吹彈六博揄袂獻笑無不以詩為遊戲心

營口授史不給書而訟繫前後數年所得詩尤多方坐
獄堂下健卒猙獰立銀鐺累累呼晷聲如沸手拳據地
顧伍伯乞紙筆作送客遊大梁詩二十絕句投筆起對
簿詩語皆驚人素與黃山吳生善吳從公獄中久其為
北雪詩序略日記初冬余與生夜坐為詩漏下數十刻
嗚嗚吟不止或至心傷則相對泣嘗對卧薄板上忽聯
句或兩人擁敗絮從口吻中濕不律露臂爭書薄板躍起
短燭撲滅一笑而止其高致如此按肯逾年遷叅議江

南督糧道復遭劾解職聽勘事解尋卒公才器揮霍善
經濟喜議論疾握齟拘文吏當大疑難剴斷生殺神氣
安閒無不迎刃解者自筮仕即在兵間尋擢臺職益欲
以意氣自奮不幸遭亂歸才為特需十年之間晉歷卿
貳然時時與世牴牾庚戌再被論忽夜起徬徨取火盡
燒其生平所著述百餘卷曰使吾終身顛踣而不偶者
此物也辛亥冬某遇公西陵佛寺留飲拊几太息謂余
曰吾與子相見今無幾今我年六十子歸為我作怨老

堂酌酒歌而已恕老堂者公所居著書處也余渡江詩
不果作然竊歎公之才其轍珂歷落而老且衰於此視
其中默默如不自聊將遂已也循公之迹考公之志則
古之大人君子其身尊名立人望之者不可及而當其
壯年逾邁俛仰身世出處盛衰之故其皆不自得者乎
則夫世之辭富貴而就貧賤寧獨善其身以置生民之
休戚理亂於不顧至于老死而不悔者彼亦誠有所激
也嗚呼可以知公矣公好獎與後進嘗寘一簿坐上與

客言海內人才某某輒疏記之諸所嘗經過雖深山穴處中物色無不到見少年能文士觴辭隻韻立為延譽或數屏車騎過之出其名字老生貧交相依如兄弟其為文及詩機杼必自己出語矜拔獲不蹈襲前人一字劇欽湔濯而歸之大雅尤嗜繪事及古篆籀法每天明盥漱出外舍從容談說古今圖史書畫方名彛器皆條分節解盡其指趣客退則手一卷燈熒熒然至夜分歸寢以為常元配馮淑人生子五在浚國學生孫男女四

人卒年六十有一將以某月日葬于某原銘曰

謂莫知耶為大司農謂逢其時胡蹶而終詭嚮偁規滑
稽乃容余不忍為奚辭固窮烏石巍巍滔滔大江文蒸
武施唯公予功公之德威汔于數邦肆我文辭砭鍼瞽
聾萬派千支于海朝宗如賁待楫如懸待撞晚歷嶮崎
益放而洪誰其司之命彼祝融悠悠我思蒼蒼彼穹北
山之崖嗟櫟園公

山陰仲淵何公合葬墓誌銘

甲寅歲余與山陰何嘉延同客揚州郡署每言其先府君御史公事輒嗚咽涕洟不止而是時去府君之死已二十餘年矣今年復會于金陵得見故人魏冰叔所為公傳略而嘉延亦自以所撰行狀遺余求為之銘當丙戌五月江上師潰公棄官至剡之白峰自恨不及從亡則作詩投崖而絕久之復甦為土人守之不得死隨逃入萬山中披薙從方外遊晝夜作苦猶自謂去人境不遠復瓢笠往來縉雲義烏諸山與樵翁衲子侶行歌獨

哭顛顛枯槁終至于一死而後已推公之心蓋無一日不以生之可悲而得其死之足樂也然公初嘗有意於用世矣其釋褐始令建平也邑故無城郭前令興築之未就公曰是東南門戶也不可以無完功城之浹月而工罷民不知役歲久旱大江以南飛蝗食禾殆盡獨無入建平界者未幾以憂去蝗遽入北鄉於是民益以為神補任高要端溪受黔桂諸流夏潦屢為災即躬巡堤圩增卑培薄而蓄洩以時遠近反受其灌溉清權關之

假手吏胥得上下其手者掣視有定期商無滯賄官有裕課蓋公之所欲見於政事者方銳未已此特其一二不幸又丁父艱歸隨遭亂未得盡試浙東事起強以御史召不得已就職建白數萬言或行或不行而事勢已不支矣墮白峰不死後入陶介山事山主雲藏禪師舖糈不繼隨衆樵汲同事者皆為公難之公曰吾視出沒風濤間瞬息生死者何如而敢自言勞苦哉自此遊益遠入山益深崎嶇崖壑鹽醢并絕所過皆留詩紀歲月

遇高僧郭蓮峯徵君李秘霞喜之結塵外之交館留崇
聖寺黎床風雨三人者相對默語終日人不測其所以
居數月而病作先是己丑四月公謂李徵君曰居此久
幸少安顧此中常有戚戚者行別子飛錫白雲之鄉耳
今留一緘與家人俟其來則示之至是病因令出所緘
書讀之曰吾茹荼磨勵齋志至此忝厥所生毀傷莫贖
於君為不忠於親為不孝死後切勿棺殮我當暴野三
日以彰我不忠之罪三日後火化入塔不得祔葬先隴

以彰我不孝之罪讀竟而絕然其家仍以殯歸葬於會稽上竈之玉几山者以公本非出世者從公之初志也公娶商氏大理卿為正子中書維源次女有婦德所刻苦佐公吏以成其廉隱以就其節者夫人之力居多後公十三年卒公諱宏仁字仲淵初中萬曆乙卯科副榜天啓改元覃恩以貢士試吏部得州守不就中庚午北京鄉試丁丑成進士六世祖詔南京工部尚書高祖鎬曾祖景皆贈長蘆運使祖繼高江西叅政父光道贈御

史而母贈孺人陶氏禮部侍郎文簡公望齡之姊也公性至孝未遇時事親能先意承志所求無不獲人不知其貧然知其能貴而盡節於所事也少不為俗學所師友皆賢者既習聞外家教後劉公宗周講學里中復執經其門癸未進士余公增遠者字若水志節士亂後躬耕山中自匿迹不與人接公之歸葬玉几山也公子拜求其題主余公即許諾至期以舟迎之來不赴頃之自掉一小艇徑詣墓側取舊衣冠拜墓上事訖下山賓主

不交一辭主人使客追之固留之飲食則舟中一庋粥一盂羹菜一豆取啜畢急挈舟延緣去會葬者百餘人皆目送嘆息謂非公之賢余公且不易得致也子三人嘉迪嘉建嘉延俱守先志不求仕今存者嘉延最賢有文行與余善女三人長陳次駱次魯其適也孫五人思永愈永惠永嘉迪出恕永出繼嘉建亦嘉迪出懋永嘉延出曾孫三人經鈺經銜經鏐銘曰

墮以崖不死歸以息如此嘿嘿乎誰與為徒生棄厥家

披緇而髡奚別矣終返其室有鏡於縣孰鬱不宜孰謁
不虔御史之阡

明經李君墓誌銘

泗之盱眙有兩賢士曰李生崢瑞蝶瑞同舉新令選拔
貢生來京師詣余於邸舍先之以詩各一卷詩皆有家
法余覽而亟嘉之問其所從學曰噫先君之教也他日
又來狀其父世系行事稽顙而請曰先君即世四年矣
而墓尚未銘蓋慎之也今遇夫子而不得銘吾無以慰

先人於地下余辭不得按狀君之孝也為母疾千里致醫得藥必親嘗終喪不室處其仁也環里門親黨之貧無絕炊者其重朋友也海內名士道經淮泗者視其家恒若歸其泛愛也雖書畫星厯醫相之士博徒劍客之至者無不館而食之其少時常負經世意高視濶步氣凌其儕輩已而志不就潦倒諸生間中遭放廢者數載雖人事錯迕亦若有天厄之者然久之始援

恩詔貢入太學而君已病矣君廣涉書傳伸紙為文立

就然性尤嗜詩而特工既得病坐卧一小園對花竹玩
魚鳥欣然移日好友過從必強起延坐留飲食飲必賦
詩晝以繼夜酒闌燭拔童僕僵睡或至日高春尚倚床
苦索句不休自卧病二十年之中坐無一日無客客至無
一日不吟風雨寒暑以為常竟君之卒歲君諱某字某
別號西園卒以康熙二十八年丙寅之八月某日得年
五十五元配王氏孺人繼王氏子二人即嶠瑞嶸瑞女
一人適宋子儁其先世茶陵人始祖文遷巢明興以軍

功授衛百戶鄱陽戰没子寧襲職調衛泗州遂家盱眙
焉祖某處士父某太學生其從祖官行人紹賢當武宗
時直諫廷杖死追贈忠端者也公既好為詩嶸瑞兄弟
跪勸止之曰爾毋然我吟得佳句體為之輕詩不啻藥
石我矣以故君詩多幾至萬首今存者僅十之一藏於

家銘曰

詩道性情發神智兮滯淫結轡和扁與試兮沈思綿綿
和湯液兮劃然理解針石熨兮以詩為醫形往神留兮

靈氣恍恍往來此邱兮如聞吟諷聲宛轉兮與俗刮除
腸胃浣兮嗚呼君不尚有後其傳克遠兮

桂林知府翁君合葬墓誌銘

戊午歲在京師聞翁君武原名籍甚時君已為選人得
黃州丞將出都與相見極歡其家故與余先兩世同年
友余為文贈其行叙所以幸見君者而及兩家世契之
厚既君佐治有成上計再至都余與同飯於汪祭酒宅
遂別又一年君遷守桂林未幾罷去任旋聞其死也而

悲之蓋乙丑年十一月二十六日也元配張宜人先卒
於署至是十年未即葬孤震來京誦余向所為文謂習
於君者而謁之銘將歸謀合窆焉翁氏先籍海鹽明正
統間始祖茂徙居錢唐之鐵冶嶺二百年以文學世其
家高祖諱立德福建建寧府教授曾祖諱常益歲貢士
祖諱聲業前庚午舉人入

本朝官福建邵武府推官父諱世庸順治戊戌科進士
歷官雲南廣南府知府父子所至皆有政績可紀君諱

介眉字孟伯武原其別號自年向學時廣南公課以古
學意遂篤好磨礪日新入成均每試藝出必驚其同輩
前後司成交重之然兩試於鄉闈輒不利而適當

朝廷以新例招徠天下之仕者皆奮然曰吾與其以舉
子而聽進退於有司也豈若應

天子之命貲而官猶得行吾志其以黃州同知分治岐
亭也岐亭去黃遠丞得代守親民事君乃洗手奉職釐
剔弊藪勸農講學一切與民更始於是上官始嘖嘖歎

君才時猶用兵湖南被檄解戰馬長沙又檄調巴東料理軍事不行委督造船湖南轉餉於辰靖二郡兩攝孝感蘄州篆蒞岐四載用賢勞奔馳坐席不及暖其攝孝感也岐亭人爭訴盜發近山非使君不戢欲奪之還而孝感民復爭之然卒還君於岐盜應時而散黃闔郡饑君親行郊野勸賑出穀百石為富民倡以故民聞巴東之遣而遮道號泣留不得行上官聞之遂追還前檄黃俗健訟君一治以清淨豪家多蓄奴僕失勢輒叛去有

反劫制其主者君則威之以法其風始息癸亥陞桂林府知府省廣南公於潼關時廣南公亦被

命新擢父子同時二千石皆翕然有仁廉聲先後抵漢上聚家人宴飲久之分道去聞者以為榮至桂林省會積案繁夥君隨機剖決庭無留牘居一年以斷僧元正不宜倚勢侵故相墓地葬其師迺撫軍意被劾明年制府白其寃事得解然君竟以是去位而廣南公亦丁內艱將歸君欲往迎之知己發滇不果去遊粵東遇疾至

英德卒於僧舍年僅四十一君生而王母父母俱存兄弟四人君為之長曲盡孝友道家無間言居官有暇即觀書常為

本朝詩選士大夫多稱之張宜人奉姑童宜人於署能識君意盡力供甘旨以時起居得其歡心與君同年生前一歲死故童宜人與廣南公之哀如後哭君云先是君隨廣南公隴州王輔臣叛略地至隴城無兵守被陷廣南公走間道出迎

王師謹侍左右不暫離家人皆避難山中震年九歲忽散為一卒挈至清水縣將西去有野老同驛卒二人知兒府中出從卒叩求得之投公父子驛中既歸治而家亦無恙君止一子震也今長大入太學能讀書紹其家從余求文以圖君之不朽於後君雖不幸蚤死厥施不大究積善之報其在此也夫震有一女弟許嫁知縣王永謀葬以某月日卜吉於某原銘曰

君嘗自悲績學不第用貨起家遇違其志不知科名以

人重輕仕非一途賢者餘榮彼之攘攘而綬若若以君
視之鷄羣一鶴齊安之績匪曰予德惟良牧伯好是正
直蹶於始安亦非已愆守道不容自古所歎黨邪醜正
吾為彼衰方剛而殞復誰尤哉有德貽後有子肯構有
述於文孰云匪壽

明經吳君約菴合葬墓誌銘

君吳姓諱鉅字任斯江南清河縣人祖黃明萬歷年鄉
貢士涇縣訓導以經義造就生徒多所成就學者稱為

心融先生卒年九十有五少承先訓學務有本言動必
以禮毘陵孫文介公慎行深所器重延致家與之講論
易理成心易解一編父諱某早歿訓導公在堂侍養備
至間從容請質經義得其歡心竭力為兩幼叔營婚置
產及其自奉泊如妻子至衣食不周不問也然吳氏世
績學未有以科第顯者自訓導暨君祖孫間雖日以讀
書明道為己任顧謂

朝廷設科舉本以待文學行誼之士吾業變書為博士

弟子而學力淺薄不足以稱

明詔豈必有司不公明之過故每至大比必持牒入省
門囊卷橐筆與儕輩露宿堦下低頭就席舍年已向暮
髮蒼然矣然每試必興興輒報罷而君與訓導公俱先
後需次為歲貢生薦於

廷君遇康熙乙卯冊立

覃恩例授州同知非其志也亟請於部改教職歸盡焚
其所為舉子文字而以其所學教其四子皆成立元配

高氏孺人有賢行佐君督課諸子尤嚴常躬織衽至丙夜諸子請休不肯曰吾但聽爾曹讀書聲便可忘寢君初被貢後猶攜長子湛鄉試孺人典叙裝行無倦色曰吾於爾父子放榜時心胆俱碎矣嗚呼

國家制科三年即放進士至三四百人少亦不下百五十人而天下省試所錄士亦無論以千計其間賢不肖雜揉冠未上頭一經未上口猥立賢書冠進賢以文序於縉紳者何限而宿學碩儒砥行立名蹉跎而不進終

于襤衫席帽齎恨入官如吳氏一門祖孫父子夫婦之間至于涕洟相慰勉貧老至死而不悔彼為之有司者果公與明非邪詎獨無人心耶夫自有道者視之窮通得喪彼在外者亦何與已事奈何當事者之曾不加意致使士沒齒有不平之嘆也君享年七十三卒以康熙某年某月孺人後君幾年卒年八十子四湛恩貢生候選訓導沉邑增生先歿泓瀚俱歲貢生合葬君於某原以丁丑年某月日銘曰

人言科舉有礙於學政有益于科舉兩者得失孰為細
巨孰營營乎斯而能以兼取愚公之山三世以之子子
孫孫山畏而移湛沆泓瀚角立嶷嶷有美封壤草茂泉
滋魄歸其遲必大其筮

誥封韓母何夫人祔葬墓誌銘

古者夫婦無合葬之禮周公蓋祔而孔子亦合葬於防
其禮起自中古然禮婦死夫為之主宜非子得銘母死
祔於父矣而復得請銘於賢士大夫者唐宋以來嘗有

之蓋緣孝子之心痛所生之日遠徒以致其不得已之情於其母耳故君子不以為過若今

誥封一品韓夫人之葬非獨其情之不得已也其德更有足紀者此余於其嗣子銓兄弟之固請尤不忍其無聞也夫人姓何氏父諱某年十四歸於故兵部尚書兼都御史韓公諱某為元配尚書公父諱承宣謚忠烈明末為歷城令狗難家破公以弱孤童從

王師數年又從

世祖章皇帝入關定鼎擢吏部郎遷宗人府啟心郎公時悲念忠烈公不置夫人為言聞有姑尚在蒲盍訪而迎之以歸奉養是君終天之恨得釋而忠烈公為不忘也是時公居官貧甚乃鬻奩餘為公裝行迎王太夫人諸弟入都內竭孝敬之誠外盡中饋之道故王太夫人安之喜有賢婦而公諸弟俱得藉以成名暨公出撫江南再督師偏沅滇黔蕩平移節西川夫人皆隨行而其任偏沅與賊相持于七里山也夫人括家貲給飽騰鼓

敢死之氣往往有烈丈夫概逮事稍間見居民室廬殘燬捐金造屋數百間以業民之露處者後子銓出守衡州有老父數十人拜馬前願一見太夫人為幸其遺愛感人心如是即所以佐公者可知矣夫人待庶子鏐有均平之德接猶子及族人恩意必周然性嚴諸子不正衣冠不敢見自尚書公捐館數年家難作夫人備經憂患賴

天子寬厚傾巢復完臨歿呼諸子榻前屬之曰我家非

聖德保全斃斃一老嫗欲再見汝兄弟得乎吾今以天
年終復何恨願若等世世勿忘上報

君恩四字十弟令陵川歸亦以此語之遂取命服加身
而卒康熙丁丑十月十三丑時也得年六十四歲子銓
安陸府知府鏐高州府化州石城縣知縣卒于任銳應
州知州鈞漳州陵川縣知縣錦候選知縣五子自鏐外
皆夫人出女六所適詳尚書公表狀中銓兄弟既卒哭
以今年四月吉祔葬夫人於涑水縣之新阡銘曰

大人嶽嶽孕靈鍾秀亦資幽贊內德之懋猗尚書公四
牧巖封既文以武著勲鼎鐘厥有賢配配惟以德順于
姑璋子承家克爰相夫子蔚為國楨佐籌行間才亦足
稱沒而遺誠小大莫忘耿耿

君恩指此幽壙

文學邵君墓誌銘

君諱儒榮字仲木別號懼叟無錫人君歿後予嘗讀君
之遺文而嘆後之學者自科舉制興而古文之道衰其

患莫甚於今之所謂八股者驅天下之聰明才智以從事於無用之章句終身濡沒而不得出故其間能以文章自見者必少年早達之士而老生宿儒或不暇以為即為而不能工與不及俟其成因以湮沒無聞於後世如君比者何限也予來無錫從君仲子紹棠讀君文財三十餘篇觀其所為顧太學子方傳與陳太守墓碑私謂漢太史公之法不傳於今久矣顧獨於今得之惜當時有司無知君才者而君儕輩亦未有商榷古今以斯文

相砥礪者故君亦不能以功名自見即所得文旋亦散矣不自愛惜以是益落魄放棄其文亦不甚名於時以終邵氏宋康節先生後元末有科貢士諱偉者來居無錫是為十世祖明太祖定江南戶籍無錫獨虞郡二氏得占儒籍故其家世業儒八傳為諸生諱某生贈叅議諱士宏士宏生壬戌進士山東右布政使司諱名世即君父也君少為貴公子文采弮褻所交盡一時名士以其間選伎徵歌而觥籌交錯投壺蹴鞠之戲以為常既屢

及省門不第視天下雲擾乃日與其徒勤習騎射為鄉里守禦計自是無意於科舉之業矣連歲崎嶇兵燹家益落亦不復能為向時豪舉日閉門誦經史子集每至終卷其部帙行次前後皆可舉覆故其為文悉有根底自君死後人稍知學為古人文字乃鮮留意於經術而規模近似轉相標榜其風漸繁漸熾浸以成俗君信能文章矣然生平不自炫鬻及沒而猶無所稱於世而獨予竊歎賞之以為遠過於今之作者予之言果足重乎

其或者不足以取信則君之厄於前而伸於後者亦未可必也君才略倜儻天性至孝初亂起獨走數千里抵山東從羣盜中扶掖方伯公歸其家己邑中諸少年乘亂欲劫掠富人家為變君密數其豪數人給之粟而好言餌之謀益解邑以無事丁酉友人以有事逮獄者君間至京邸經營之事得末減歸而鬚髮為之盡白諸相往來遇緩急傾身濟之終以此竭其貲而不悔亦不以矜於人晚棲心禪寂常布衣蔬食日坐卧一榻雖文

字之緣亦不復作然君年未老其氣力猶未憊宜可久
視徜徉於世一旦患左掖微痛針熨不得施五月而卒
豈其所見者達而其中猶有未盡平者哉君卒於康熙
乙巳某月得年五十有二元配唐孺人與君同庚先十
七年卒子五人曰紹聞紹棠紹祖二殤女五人皆嫁士
族紹聞等以今年卜葬合葬君於小嶺灣之新阡君之
屬續也家人泣問以後事曰吾不孝不能為八十老父
計何暇計汝等哉終無所言後三年而方伯公卒方伯

公為吏廉歿時幾無以為殮其父子之間有足悲者銘

曰

其才以窮其命之逢嗚呼命兮誰司之雖不吾以昌厥

辭我銘其幽君當知

掌京畿道事監察御史任公墓誌銘

今年夏四月二十有六日御史任公病卒於官嗣子筠偕其弟塤坪將以某月日歸葬於某鄉之某原以狀來請銘按狀公諱珣字少玉希庵其別號中順治十五年

會試十八年成進士康熙八年選知山西石樓縣事考
選授浙江道監察御史巡視長蘆鹽政回院晉掌京畿
道事卒年五十六歲任氏世大梁人始祖仕宋為高密
尹家焉名其所居里曰梁尹社曾祖鎧太原府通判祖
澄父復皆邑文學復贈如公官母鹿氏贈安人初公兄
弟四人伯瑛早卒仲琪季珂相肩隨受經外傳公姿性
開敏所讀書過目即能了其大義弱冠操筆為文已與
兄琪齊名矣乙未琪第進士積官至禮部員外郎後三

年公遂聯舉南宮會聞贈公疾不待廷試立馳歸時禮部亦解登州學職歸養公與其兄弟三人侍疾視藥劑溫涼燥濕問起居食飲宜適與否必謹沒則盡哀歛送以禮由是鄉里稱之其為石樓也邑故磽瘠民間不知紡織公令家置紡具教之法月責布一端賞罰其勤窳者於是民始興於婦工縣去河東解池幾千里而食平陽鹽轉運萬山中勞費以數倍民苦淡食公議食汾鹽固請於上官乃得民至今蒙利御史巡城時以軍興攤

門稅移屬於正額外無敢私分毫入視鹺政疏劾巨蠹
為商民患者釐剔夙弊盡根株乃止還臺封章十餘上
中如免粵西帶徵錢糧及軍政宜與大計同行請為宣
聖廟立碑疏俱得

旨施行然公意猶未已也每朝回簾閣據几伸紙舐筆
摹晉魏人書數十行濃淡疎密皆有意謂子弟曰吾作
書萬慮俱遣亦收放心一事然知公者以公雅不好聞
窺其微意如有不自聊賴者無已而託之於書又卒晦

其說如此雖子弟不欲令其盡知可悲也公素友愛自前年冬禮部去世明年弟明經繼之日益傷悼不自勝遂至不起初公以御史需次於家邑大歉與禮部捐粟三千石食餒者所全活數萬人故死也人莫不哀之遺書有敬事初編二卷元配閻氏累贈安人繼丁氏封安人筠閻出貢生塤坪丁出塤邑文學坪舉人女三長適諸城候補行人司司正李濰潤次適邑文學王自惇次適登州文學沙汝肥孫三士錡士銘士鉞銘曰

為吏也良躋於廟堂嘉言用彰不容容而居不逐逐而趨命止於斯而志則有餘落落寞寞其中有託豈其於世有不如意不歌而喟世真可棄澤未究施算不厄而身亨而道年五十九不為天羣挽推我無動一人同之可謂衆生不虛斃以正弗之有悔視治命葬三年如有待為我助者其東海

文學馮君墓誌

元恭以庚午年十二月某日卒去年余南歸其孤用潛

稽顙而謁於余曰吾父之卒前數日自整比其詩文數十卷已命某從牀側盡讀所為詩某篇宜存集中某篇宜去或口易數字而後存者讀既命復之某曰夫子之病亟矣願少息則遣誠喪事宜一遵家禮歛以深衣巾履不得隨俗作佛事凡故人所親厚者各口占書與之訣又曰下窆宜有銘以請於執友姜君吾平生其所知也初余與君交時纔弱冠居相鄰也始用詩詞相倡酬已應諸生舉去為時文俱不意得則學為古文每晨坐

談論至忘寢食巷中兒爭笑以為癡及余中歲負笈遊四方為衣食計又數從鄉舉未能卒業斯事而君獨家居能日致甘毳侍養太夫人以其暇溫習經史汎濫百家屢從方外人遊究其宗旨性又通悟洞解樂律旁曉青鳥遁甲家言時時為人稱說城北郊故有宋楊文元公慈湖書院於是又與里中耆宿朔望詣為講學之會雖應舉業亦不數作故三四十年間元恭之文日與道偕進而余為文至老不能自名其家至於性命之學槩

乎未有聞焉凡此者余之所以有愧於元恭顧元恭有勝余無不及也猶憶往時里人有暴死者余曰是不知怖死亦省諸苦元恭曰不然夫臨時須了了彼神識昏憤如何離得生死及觀君彌留之際若真能談笑於去來間者然後知向者慈湖之會君蓋實有得力至此而始驗也君嘗獨處一室垂簾靜坐其中晚益不喜以學道為門戶雖講學之會亦不復舉務在躬行而已而近來標榜為名高者競牽挽之使入竟掉頭不一顧君豈

固以求異為哉夫亦誠有所見於中不可奪也自君沒而余之道益孤講求亦日廢其將終其身以訖於無所成也故於志君之事有餘痛焉君諱宗儀姓馮氏元恭其字別號魯菴曾祖光祿寺丞諱某祖贈刑部員外郎諱某父諱文偉明崇禎丁丑科進士歷官揚州知府以文章為名太守母楊氏封恭人娶通山令周某女生二子長用潛邑諸生文與行足世其家聲者次用準次用潤女二適大學生王某諸生周某某皆前卒所著有春秋

三傳謹案三禮謹案律呂謹案文集詩集各如干卷君以癸卯年遊京師館於大司寇徐公邸踰年病脾歸後再往病復作歸僅兩月而沒其歸也徐公資之行至腆其沒也許文表其墓而助之葬云

太學生謝君墓誌銘

君謝氏諱諤昌字殿侯以康熙壬子歲十二月初二日歿於京師而葬以今年壬申之三月壬子者方歿時以孤幼有待也君將葬之前月仲子緒欽持伯父大周所

述行狀謁余舍請銘殿侯從余遊久其行事余所稔知
固不待狀而信而大周之述其弟無諛辭余故按其狀
以余所見聞誌之墓君為人沉靜不佻轔篤於孝友無
他聲色嗜好雖羣從相聚圍棋賭飲君默然無所與吟
誦之暇正襟寂坐而已既補邑博士弟子員丙申丁酉
間從余為制義時余尚年少見君兩房兄弟十數人登
梓山會課競出意見恥蹈襲為文多倜儻雄邁之氣而
余亦攘臂其間以為文家務出奇無窮當如是獨君持

論根柢先正操筆不苟下凝思良久必會文切理合於法度然後止及成出示同學者余與諸君未嘗不稱善而其尊甫給諫公尤時時賞愛之以為不後於諸凡君狀貌白皙豐下大耳準相法當得壽以貴以故給諫公屬望之頗切無何公捐館封太孺人老病在堂君兄弟皆尚不得第君奉太夫人盡誠敬道常侍飲食次陳說古今史傳所記載事蹟嘈雜兒女啼笑並作冀以此博老人歡退而竊歎碌碌懼終不足以當大人意遂銳意

入京遊太學經年忽患痰氣逆上自漏初刻至夜分死
時從兄御史瞻在及兄子明經敬躋在邸中與訣口不
能言引敬躋手以指畫大人兩字於掌上遂瞑其死不
忘親如此可銘也已謝先世宋平江人建炎進士諱宇
為定海令遂家焉曾祖大綸以仲子涓仕明萬厯間四
川布政使司左叅政贈如其官父諱泰宗進士令番禺
陞工部主事改兵科給事中元配葉氏封孺人生四子
最後得君生甲戌年七月二十一日卒年三十九娶董

氏子男二人緒禎緒欽俱邑庠生女三太學生任瑄玉
邑庠生王之純及丁慶潢其壻也緒禎兄弟卜吉葬君
於雁蕩鄉之新阡銘曰

韓退之之哀歐陽詹也曰詹在側雖無離憂其志不樂
也詹在京師雖有離憂其志樂也若詹者所謂以志養
者與嗚呼君於遇可謂不幸君之志視詹可以無媿方
君之生也才而父知之其死也母哭之哀比其葬也下
從其兩親以遨以嬉而又奚以悲

贈工部營膳司主事張公墓誌銘

余至都之二年歲癸亥秋今工部主事撫寧張君有園在阜城門外東北陬修登高故事置酒召客南北知名士會飲者三十餘人於時主客衣冠濟楚揖讓登進禮容之盛尊壘几席圖史之設上下池館流眄花竹客無不灑然意得者酒酣以往分曹限韻各賦詩一章以退蓋是時都下文會寂寥久矣明日相傳以為盛事余亦因是始識工部君先是君尊甫贈光祿公已棄世二十

餘年太夫人在堂君自是以終養告反津門矣數年太夫人即世工部君既扶柩數百里合葬於撫寧某原之舊阡而以隧道之辭屬余者以光祿公早沒渴葬銘詞未備且以余之獲交於君習聞其家世故也公諱某字某世永平府撫寧縣人少孤貧嘗躬耕塞下獨用恩意徧結其裨帥使約束所部無擾我閭里賴之耕作以安於是豪長者羣推服以為能久之不樂葬其父母服闋隻身走京師隱君某公者一見竒之妻以女遂家焉即

封夫人某氏者也公涉獵書傳其依傳經義款曲為人
言仁義忠信之道若老經生家聞人善稱之不容口即
見有過掩覆之如不及於前代史傳興衰是非得失之
故娓娓談說洞中肯綮如身與其事者時為人謀議事
後不失銖毫以是縉紳先生咸樂從之遊所居纔陋巷
席門車騎過從不絕也後徙家天津稍事居積家益大
饒然常所餽遺賑恤費累千金松江守張君未第時落
魄無貲賴公經紀其家用及為吏貧不能之官纖悉皆

取辦公無倦容公沒而張為制服以報其感人如此年五十七卒卒之時工部君始七歲夫人則舉契券簿籍悉付之公仲弟長齋誦經絕口不言外事而家政益修勅張氏戚黨歲時來者虛往實歸為工部君延明師廣市書籍以資其學業工部君以藐然孤童得遂成立夫入之力也曾祖某祖某父某公卒于康熙癸卯年某月日三世皆以工部君贈如其官惟古之制曰夫尊於朝妻貴於室爵不上逮也自南北朝始有封贈其祖父而

自父以上官以差殺未如近制之隆厚漢置武功爵官
首補吏與今例畧相似然爵僅得至第八級樂卿止耳
獨工部君績學登朝聲華蔚起贈及四世階崇一品遡
厥發祥所自既受得祉僉曰宜哉雖

朝廷一時權宜之制所以彰善勸後者至矣工部君名
孫五人銘曰

始齋終豐以道不窮既豐而死惟有其子非惟有子內
教克理

紫誥煌煌命服有章或被於身或貴有藏襟海帶關我
藏孔安是為善人光祿之阡

周節婦墓誌銘

陳子大成以其祖母周孺人之銘來請曰願有述予曰
孺人守節之始末可得詳乎大成曰吾祖母年未三十
而寡八十八而壽終既寡之十餘年某父母又不幸俱
沒撫某不肖孤零丁孤苦猶幸上無奪志之親外無侵
凌之暴故得以安守其志節而不至有毀面裂身之慘

可以驚世而駭俗者雖其更歷五十八年而名不出于閭門然至今居吾里者見吾祖母之終始不渝其志莫不交歎以為難能見其雖老而強飯享逾中壽又莫不以為所宜得見吾兩世之無所成立而不得以養又莫不以為天道之無知而為善者之爽其報吾祖母之賢其在人耳目者如是而已唯是大成孤賤不能上於

朝而褒旌之如禮非子憐其志而述之則後世何傳予謂婦人之道無非無儀故列女之所錄者蓋少其可傳

者以其處變而能者為奇節以列於後世耳至于履變
故而不失其正區區楛拄如孺人者卒立門戶此中庸
之行君子之所樂道也孺人夫某子某孫大成某月日
大成以其柩合葬於某原銘曰
婦一終士固窮孰渝之視此封

湛園集卷五